

112 年全國語文競賽原住民族語朗讀 【拉阿魯哇語】 高中學生組 編號 2 號

patakumahlumahlungu

ma hlimiungu utulu caihli unumu vulahlu mapuahlu unumu aari
mualualunai macua hlipau tuhlangia cucu'u mumua tahlanaia ucanika
tapangu, macuka tahlana tavula maruaru sakurahlu taungala, kaluvungaia
kuacahliaisana cucu'u usumanu. kiariaria, tahlana hla'alua naia sapautu
cucutakacihlia tapangua, malialungusu kani'i vungukatahlana,
apatukarahla ihlata kuparaiahla maivaru vunguka hla karitahlanata, ausi
maraiahlu, hliangahli salirina takumu'au, marapihli maiaili ngahlata,
maingahlangahla kuhlaisai pasamamanganua cucutahlana hlamuna
tumuamalaaili umala ngahla hlamu, kiariari tahlana tavula, micikiricu
malavalu maravaru'u maracani tahlana hla'alua.

mataingalucita kani'i pacanituku, maiatuhluhlu sitakuamia hlamu,
vungukana, kukiahlahlamuhlu hlahlusa ahlaina, hlamama hla alalamurua,
pasamanganu taku'i'iaru mairahlu ta'iarahlamu, ta'iaraisaka, takacihlicua
mu ucani tahlana. maci marua hliparahlia taiaraia, tuahlu cucutahlanana
aruapataluluvu arupatiakili, apulavau aunani mahlataraia inicita,
tuahlu micalivi aucaucani, hliki tararia langulangu.

macua sitakua hlamanaia rami saka tahlana, ausi maraiahlu sipuamia,
hlahlusa 'ulusu saliatasu ucani palungana kiu'u, maci maluacua ramiisaia,
kucu ariakuhla malimucucutasu, mamacicuka kiu'u, ucani tahlana maci
uka'aka sitakuamia vungkaia, cucutahlana aramuamuarua, asapu ihlakia
takacihli, ulavaisa marahlupuka sitakuamia vunguka, hla hlitamahlunga
kari tahlana. kuhlaisai, kutatuhlu asapu vungukata hla karitahlanata,
angahli ihlakia musuturu, hla tumaluluvu siturarau tahlana. ausi kani'i
mitungusuna maru kani'i sikilalialina mataingalu pautuhlangi
vunguka takacihli.

maracani varu'u muvavilihli, tumuaita matavilau pasamia takacihli,
umahluahlu sitakua langulangua, manikivaru'u katahlanataia, hla kukia
asapu taku sitakuahlusuhlu, hla sipacani takua ahlamatana.

112 年全國語文競賽原住民族語朗讀 【拉阿魯哇語】高中學生組 編號 2 號

覺醒

之前大家所認識的鄒族，侷限於阿里山北鄒，位於高雄桃源的南鄒，鮮少出現在大家的印象中。過去，在北鄒的光環下，我們被一視同仁，現在民族意識的抬頭，讓我們發現彼此的不同之處，像是從睡夢中醒來般，為了尋回自己的名字，重新拾起我們遺失的傳統文化和母語，經過族人們努力爭取，過去的南鄒，已蛻變為一支嶄新的民族——拉阿魯哇族。

現在我們要團結，來維護我們的文化，不分男女老幼都應出力。發生事情時，族人們都能互相幫忙扶持，這樣的精神讓我們通過每一次的考驗，毋庸置疑這就是我們特有的傳統。

傳統是一個民族的根，一棵樹如果爛根，養分無法傳輸到枝幹，樹就會死去。一個民族若沒有了傳統，族人就會忘記自己是誰，最後失去文化、語言以及社會制度。所以我們不能忘了我們的語言、文化，從我們開始學習，並積極的參與族群的活動，像是聖貝祭。在祭儀活動中更認識自己的文化。

身為新一代的我們責無旁貸，擔起這個重任，族名雖新，但不要忘记，我們維持傳統的心始終如一。